



Esed Radeljaš: Tuđu imovinu preprodavao kao svoju / DAMIR ČUMUROVIĆ

Radeljaš i Hadžić prali novac

Optužnicom Tužilaštva KS-a obuhvaćeni su i Jasmina Horo, Nedžad Kapetanović i Jusuf Čaušević

Piše: **ZINAIDA DELILOVIĆ**

Sarajevsko kantonalno tužilaštvo okončalo je istragu i podiglo optužnicu protiv Eseda Radeljaša, Jasmine Horo, Nedžada Kapetanovića, Jusufa Čauševića i Damira Hadžića.

Nezakonita dodjela

Radeljaš, nekadašnji vijećnik, skupštinski zastupnik i ministar, te osnivač Stranke za bolje Goražde, optužen je za krivična djela ovjeravanje neistinitog sadržaja, podstrekavanje

na zloupotrebu položaja, pranje novca i davanje dara ili drugih oblika koristi, dok se ostali terete za zloupotrebu položaja i pranje novca.

Tužilaštvo ih tereti da su zloupotrebom položaja poduzeli međusobno povezane radnje, tako što su nezakonito proveli postupak dodjele zemljišta u naselju Nedžarići Esedu Radeljašu, nekadašnjem vijećniku u Novom Gradu, tada izabranom sa liste BOSS-a.

- Potom su nezakonito proveli postupak za utvrđivanje visine naknade za oduzimanje zemljišta koje je Radeljašu dodijeljeno, saopćili su iz Tužilaštva.

Hadžić, koji je u vrijeme činjenja krivičnog djela bio načelnik Općine Novi Grad, tereti se da je iz budžeta ove općine nezakonito omogućio isplatu više od milion maraka Radeljašu za zemljište, koje je 2006. Radeljaš platio

Općini u iznosu od 51.340 KM. Na ovaj način je budžet Općine oštećen za oko milion KM.

Na ranijem ročištu za pritvor Tužilaštvo je, između ostalog, naglasilo da je Radeljaš u posljednjih deset godina kontinuirano činio krivična djela, tačnije od 2005. Tuđu imovinu je, dugi niz godina, preprodavao kao svoju, a bavio se i bespravnom gradnjom.

Sporno zemljište je kupio od Općine Novi Grad po cijeni od oko 50.000 KM, sa namjerom da izgradi stambeno-poslovni objekat. Kako u zakonom predviđenom roku od dvije godine nije započeo gradnju, Općina mu je oduzela zemljište. Na osnovu odštete po žalbi natu odluku Radeljaš je od Općine inkasirao 1,03 miliona KM.

Sumnjače se da su činjenjem krivičnih djela budžet Općine Novi Grad oštetili za oko milion maraka

Hadžić se tereti da je dogovorio o visini naknade koja će biti isplaćena Radeljašu, odnosno da ona iznosi 550 KM po metru kvadratnom zemljišta, te potpisao zaključak o tome.

Oduzimanje imovine

Akcija Blok počela je 9. novembra kada su pripadnici SIPA i MUP-a KS-a uhapsili Radeljaša i bivšu Hadžićevu općinsku pomoćnicu Jasminu Horo, te Nedžada Kapetanovića, bivšeg pravobranioca Općine Novi Grad i Jusufa Čauševića, šefa Odsjeka za imovinskopravne poslove Novog Grada, dok je Hadžić uhapšen 30. novembra. U ovoj akciji je hapšen i vještak Kasim Zulum, ali je on pušten na slobodu, dok se u optužnici njegovo ime ne spominje.

Uz optužnicu koja je prosljeđena Kantonalnom sudu u Sarajevu na potvrđivanje, zatraženo je trajno oduzimanje nezakonito stečene imovine, zabrana obavljanja poziva i dužnosti u izvršnoj i zakonodavnoj vlasti, ali i produženje pritvora za Radeljaša, Hadžića i Horo. Kuća koju Radeljaš posjeduje u Nedžarićima i ranije je bila pod mjerama zabrane.